

摘藻堂四庫全書薈要

集部

欽定四庫全書薈要

集部

御選元詩卷五十

詳校官原任主事_臣李斯咏



欽定四庫全書薈要卷一萬八千四百六十二

集部

御選元詩卷五十

七言律詩九

施鈞

白雪山

萬壑歸源瀉石湫洞庭名不下瀛洲聲聞大地玉龍吼
勢接碧空銀漢流道院晝陰微雨集玄壇秋冷濕雲浮
山翁指點青松外曾見仙人跨鶴遊



贈王隱君

投老西湖作隱君，鳳來龍去絕無聞。
孤山梅近聞吟月，九里松深隱卧雲。
書屋幾番留鶴守，釣磯一半與鷗分。
攜文染藻風流處，可似蘭亭王右軍。

淚

癩髓空勞補舊痕，離筵歌罷忽沾巾。
半江湘竹斑斑雨，三月楊花點點春。
字濕錦機啼戍婦，珠明綃室泣鮫人。
琵琶摘罷情深處，洗盡青衫幾掬塵。

蟠梅屋

蕊珠宮殿玉闌干四壁玲瓏夜不闌
梁棟廣平真鐵石根基和靖舊溪山
乾坤虛白生方寸雲月昏黃共一間
可笑三閭元不識蕙櫨蓀壁水潺潺

武昌南樓

鸚鵡洲邊艤客舟憲君邀我上南樓
胡牀老子三更月鐵笛仙人一曲秋
流水白雲吳夏口西風黃鶴晉磯頭
如今盡屬王孫草添得江南幾許愁

送人歸天台

君志丹山伴赤霞
忍分書劍各天涯
交情十載共為客
歸夢幾番同到家
一路暖雲蒸藥氣
半溪流水平桃花
金庭好問長生訣
莫待秋風兩鬢華

送人遷鄞分題得五湖

五湖煙水寄浮萍
濟世英雄霸業成
故國當年空鑄像
扁舟到處却更名
浪花低蘸寒星濕
秋影中涵曉月明
別後相思蘋夢遠
西風誰共白鷗盟

別友人

別酒相傾別淚流
江流亦不為君留
片帆今夜又何處
明月當天誰共樓
一雁叫霜紅入葉
十年為客白侵頭
莫嫌歸計多蕭索
三徑西風菊正秋

客中

半生書劍惜分陰
誰想飄零素髮侵
朋社有盟鷗聚散
客鄉無信雁浮沈
潮迴斷岼沙痕淺
月落幽溪樹影深
歸計未成愁入夢
一燈空伴壁間琴

謝宗可

睡燕

補巢銜罷落花泥，困頓東風倦翼低。
金屋晝長隨蝶化，雕梁春盡怕鶯啼。
魂飛漢殿人應老，夢入烏衣路轉迷。
却怪卷簾人喚醒，小橋深巷夕陽西。

紙帳

清懸四壁剡溪霜，高卧梅花月半牀。
繭甕有天春不老，瑤臺無夜雪生香。
覺來虛白神光發，睡去清閒好夢長。

一枕總無塵土氣何妨留我白雲鄉

曉色

遠似煙霏近又空非明非夜兩朦朧一天清露洗難退
幾樹暗雲遮不窮畫角樓臺濃淡裏殘燈院落有無中
蒼茫半逐雞聲散又被朝陽染作紅

茶筴

此君一節瑩無瑕夜聽松聲漱玉華萬縷引風歸蟹眼
半瓶飛雪起龍牙香凝翠髮雲生脚濕滿蒼髯浪卷花

到手纖毫皆盡力多因不負王川家

賣花聲

春光叫徧費千金紫韻紅腔細細吟幾處又驚遊冶夢
誰家不動惜芳心暗穿紅霧樓臺曉清逐香風巷陌深
妝鏡美人聽未了繡簾低揭畫簷陰

紅梅

梨雲無夢倚黃昏薄倩朱鉛蝕淚痕宿酒破寒薰玉骨
仙丹偷暖返冰魂茜裊影露羅衣卷霞珮香封縞袂溫

回首孤山斜照外尋真悞入杏花村

雁字

蘆花月底寄秋情陣影南飛勢不停一畫寫開湘水碧
半行草破楚天青雲牋冷印蟲書迹煙墨濃模鳥篆形
題盡子卿心事苦斷文無數落寒汀

螢燈

微熒閃閃拂晴波幾度黃昏誤舞蛾銀粟無煙棲碧蘚
玉蟲留影綴青莎秋空雨歇寒光墮晚徑風閒冷燼多

欲喚紗囊車武子為渠還賦短檠歌

綠陰

萬樹東風湧翠瀾
遮藏芳恨料猶難
入簾蒼靄暮春曉
滿地碧雲清晝寒
柳暗池臺煙乍濕
槐深門巷雨初乾
堦前花落無人到
又染苔痕上石闌

雁陣

渡江秋影又南征
折葦銜枚夜不驚
冷聚圓沙盤地軸
曉浮寒水落天衡
風馳截破湘煙濶
雲擁斜衝塞月明

洲渚網羅應有伏橫空千里不留行

鼠鬚筆

夜逐虛星上月宮奮髯奪得管城公橐中不攪吟窗夢
指下先爭翰苑功莫笑硯池濡醉墨絕勝倉廩飽陳紅
平生鬻盡詩書字散作龍蛇落紙中

龍涎香

瀛島蟠龍涎吐玉輕氛飛繞博山青暖浮蛟窟潮聲怒
清徹驪宮蟄睡醒碧腦盈箱收海氣紅薇滴露洗雲腥

雨窗篝火濃薰被夢駕蒼鱗上帝庭

蘆花被

白似楊花暖似烘纖塵難到黑甜中軟鋪香絮清無比
醉壓晴霜夜不融一枕和秋眠落月五更飛夢逐西風
誰憐宿雁江汀冷贏得相思舊恨空

蓮葉舟

穩棹紅衣汎渺茫風帆浪擻水雲鄉曉撐太華半峰月
晚載西湖十里香藕放雪絲應作纜荷欹翠柄若為檣

不須更捧金仙足太乙真人夢正涼

漁蓑

翠結香蓑付釣舟一竿風雨不須愁苔磯夜泊披寒去
蒿岬昏歸帶濕收月冷籠衣眠舵尾天晴隨網曬船頭
羊裘莫笑狂奴錯也著煙波萬頃秋

走馬燈

飈輪擁騎駕炎精飛繞人間不夜城風鬣追星低弄影
霜蹄逐電去無聲秦軍夜潰咸陽火吳炬宵馳赤壁兵

更憶雕鞍年少夢章臺踏碎月華明

蓮燈

萬點芙蓉午夜芳醉看疑是水雲鄉
蘭缸照破西湖夢
火樹燒殘太液香
焰暖應愁擎夜雨
燼寒不為倒秋霜
元宵庭院東風曉
零落紅衣繞畫梁

柳眼

媚嬾窺春淺碧浮欲開還閉半顰羞露垂煙縷秋波溜
雨歇風條曉淚收上苑困酣興廢夢灞橋看盡古今愁

五株彭澤回青否應是生花雪滿頭

花霧

倦紫酣紅總未醒
暗薰芳淚滴無聲
羅幃隱繡迷春色
綺縠籠香護曉晴
薄暝枝頭留睡蝶
輕陰樹底咽啼鶯
東風卷到闌干曲
半濕遊絲舞不成

茶煙

玉川鑪畔影沈沈
淡碧縈空杳隔林
蜩竅聲微松火暗
鳳團香暖竹窗陰
詩成禪榻風初起
夢破僧房雪未深

老鶴歸遲無俗侶白雲一縷在遙岑

遊絲

搖曳春光百尺輕煙綃舞斷任縱橫暗縈芳恨應無力
亂綰花愁似有情一縷綠楊風正軟半痕紅杏雨初晴
莫教飛到天機上恐誤龍梭織不成

海蟹

層濤擁沫綴蝦行水母含秋孕地靈海氣凍凝紅玉脆
天風寒結紫雲腥霞衣退色水涎滑瑯縷烹香酒力醒

應是楚宮萍實老誤隨潮信落滄溟

天燈

龍逐炎精下紫宮夜深不肯落雲中
光分霄漢三更黑影亂星辰萬點紅
玉柱倚天擎火齊金繩繫日挂瑤空
照開仙闕光明路絳節霓旌穩駕風

無絃琴

獨繭長縑底用抽蛇紋空鎖鳳枝
秋落星留暈繩光斷凍瀑無聲練
影收別鶴那聞風外泣孤鸞不向
月中愁

多情祇有柴桑老寂寂高山水自流

松枝火

蘚骨誰教劫火侵欲將春意破窮陰鱗鬣光動紅雲起
膏液香融紫霧深餘燼尚留霜後節死灰難滅歲寒心
有時焰起隨風轉猶是蒼龍澗底吟

藕花風

舞落紅衣起未休水雲鄉裏正颼颼五更清逼銀塘露
六月涼生玉井秋颼浪低翻霞影亂凌波輕弄錦香浮

莫教吹醒鴛鴦夢好送真人一葉舟

水中梅影

澄澄寒碧映冰條雲母屏開見阿嬌
春色一枝流不去雪痕千點浸難消
臨風倚檻雲鬟濕帶月凌波玉珮搖
最是黃昏堪畫處橫斜清淺傍溪橋

半日間

閒處光陰未有涯偶然一晌到山家
坐看雲起晝停午靜聽流泉日未斜
槐影正圓初破睡竹陰微轉罷分茶

也勝忙裏風波客十二時中老鬢華

雙陸

彩毖清響押盤飛曾記唐宮為賜緋影入空梁殘月在
聲隨征馬落星稀重門據險應輸擲數點爭雄莫露機
惟恨懷英誇敵手御前奪取翠裘歸

水中月

晴波浸月月波浮玉兔涼生萬頃流丹桂影沈江浦夜
白蓮光浴海天秋鮫人泣罷珠猶濕龍女妝殘鏡未收

應是廣寒眠不得水晶宮裏夜深遊

梅魂

枝南枝北路迢遙飛入孤山夜寂寥水月浮香應自返
溪風弄影為誰招縞衣夢裏和愁斷玉笛聲中逐恨消
似欠靈均歌楚些逋仙墳冷草蕭蕭

龍形松

天矯挐雲海上來蜿蜒蛻骨老莓苔紫髯夜濕千山雨
鐵甲春生萬壑雷影動欲翻平陸起聲號如卷怒潮回

蜷枝冷挂巖前月猶似擎珠照九垓

水紋

新綠粼粼漾淺漪織成春色上苔衣一池碧暈雨初落
千疊翠鱗風更微淨縠光搖湘女鏡輕羅影動水仙機
何如袖取并刀去剪取吳淞半幅歸

竹夫人

胸次玲瓏粉黛羞宵征何必抱衾裯應無雲雨三更夢
自有冰霜六月秋盡節每曾陳諷刺虛心那解老溫柔

專房不怕蛾眉妒，祇恐西風動別愁。

鴛鴦梅

兩兩魁春簇錦機，文衾夢覺月分輝。
枝頭交頸棲香暖，花底同心結子肥。
金殿鎖煙妝粉額，玉堂環水浴紅衣。
有情一種隨流去，莫被風飄各自飛。

洪希文

壽峰翫月

素娥准敕六丁擎，下照塵寰似水晶。
河漢無雲天萬里，

溪山不夜月三更蓬萊弱水何曾隔玉宇瓊樓無此明
今夜壽峰峰絕頂與君端坐細推評

蒲萄

走架龍鬚弱不支炎天待月立多時醞醕縱美輸清滑
瓔珞雖圓讓陸離珍異曾誇太冲賦纍垂已入退之詩
當年若得傳方法博取涼州亦一奇

仙邑館所歸溪行書觸目

杏花深處酒堪賒來訪漁翁溪友家短塹插籬防鹿豕

小舟牽網截魚蝦
鄉村畜牧連荒野
墟落人煙閣淺沙
自是昇平生聚久
女郎共唱後庭花

清明遊陳氏園亭

村村花柳暗晴川
百五時光過客然
綠暗園林尚佳節
清明亭館自新煙
喜逢熟食傳遺俗
怕著新衣學少年
惆悵東闌花似雪
人生底處勝尊前

糖霜

春餘甘蔗榨為漿
色弄鵝兒淺淺黃
金掌飛仙承瑞露

板橋行客履新霜攜來已見堅冰漸嚼過誰傳餐玉方
輸與雪堂老居士牙盤瑪瑙妙稱揚

袁士元

題城西書舍次韻

自笑茅檐多野意水邊栽柳翠成堆鶴因無恙老猶健
燕若有情貧亦來曲徑斜穿花影入小池低傍竹陰開
故人有意能相訪細啜茶甌當酒杯

送柴養吾先生遊四明山

春遊清興已闌珊送子扁舟獨上灘諸老謾期花下醉
好山應待畫中看曉行嶂霧侵衣潤夜漱溪泉透齒寒
林壑夏涼宜避暑主人瓜熟許分餐

和江亭納涼

晚來避暑水邊亭短髮蕭蕭涼思清笑摘藕花嬌欲語
細看鷗鳥淡忘情月依檐轉窺人近風逐潮來拂面輕
適意不知身坐久漁村漸見一燈明

和嵯縣梁公輔夏夜泛東湖

短棹乘風湖上遊，湖光一鑒湛於秋。
小橋夜靜人橫笛，古渡月明僧喚舟。
鴛浦藕花初過雨，漁家燈影半臨流。
酒闌興盡歸來後，依舊青山繞客樓。

過高錢探子章及禪寂詠心源不值

載酒東湖歲已闌，擬同朋舊醉開顏。
長鬚吟客近入郭，多病老禪纔出山。
霞嶼寺連寒水遠，月波樓鎖暮雲閒。
停舟自對梅花酌，雪壓孤篷夜未還。

借韻詠城南書舍呈倚雲樓公

曉倚吟窗曙色開
江頭野趣亦佳哉
平蕪宿鳥衝煙起
遠浦春帆帶雨來
閒種石田供鶴料
旋開園沼買魚栽
讀書自古城南好
擇地多慚吏部才

九日後有感

滿城風雨重陽後
客況淒然歎薄遊
白酒黃花非舊日
烏巾素髮是今秋
時艱開口難成笑
事往驚心轉覺愁
無復山東有兄弟
雁聲莫遣過南樓

謝樊天民先生朱以仁先生謝德清見訪并述懷

詩思蹉跎四十餘未窮經業髮先疎歸來自愧窮途客
枉顧多勞長者車荷葉池塘疎雨歇榴花庭院晚晴初
吟懷浩蕩憑誰遣幾向東家借蹇驢

汪珍

次答兌峰殿幹見寄

題得新詩寄所思從公始恨十年遲燈殘暗壁蟲催織
月滿空庭鵲繞枝客路飄零秋易感老年情味夜偏知
江煙一舸蘆花雪還憶往年相別時

李序

敬次叔父適菴先生六觀圖韻

曉起初褰薜荔裳
隔簾皓影雜紅光
雪花映日孤峰起
玉柱浮空千尺長
風急露華都是霰
石寒芝草不生芳
朝暾正似丹砂色
照耀雲間白玉牀

兩岼汀洲一浦分
隔簾啼鳥近相聞
逶迤綠水繞春色
窈窕東風交浪紋
杜若沙平香漠漠
薜蘿煙暖翠紛紛
靈源不記東西路
千樹桃花日又曛

山下泉鳴似殷雷
山前倒影射崔巍
斜陽迢遞天邊去
暮色蒼茫溪上來
青壁高懸西若木
丹崖半長夜
明苔何時落日都門道
照見東城陌上埃

庭前月色散斜暉
林下灘聲隔岫聞
碧浪有煙渾似雪
青天如水不生雲
風吹白露千崖聳
秋映銀河兩派分
吹斷紫簫聞鶴過
空中疑是玉宸君

趙偕

送伯奇入官

目斷斜陽雁不來碧空無伴絕塵埃此心久矣堅如石
生意蕭然冷似灰之子入官偏跼蹐誰人爲我暫徘徊
秋風已到桂枝上借問緣何花未開

嚴士貞

文昌閣

文昌高閣接虛明下視塵寰草樹平萬里長空浮霧氣
半林修竹帶秋聲危闌獨倚渾無賴幽鳥頻啼却有情
茗飲一杯風雨腋橫吹鐵笛上瑤京

方山

遙望羣峰擁翠鬟登臨殊覺倦躋攀
枯藤倒挂長松上峻瀑斜飛兩峽間
龍卷雲歸常帶雨犬隨人去自登山
湫池祇在危岑頂欲啟瑤函論大還

斗洞

境入龍陂氣象清竹籬茅舍最關情
峰迴路轉六七里林靜鳥啼三兩聲
犬吠籬邊窺客過樵歸洞口看雲生
茲遊莫道求碑石祇為觀山也合行

溫麻池

一沼寒光寶鑑開
禪人於此獨徘徊
籜龍引水循除下
山鳥銜花出洞來
劈箭橋幽空貯月
盤陀石古半生苔
灌溪莫道無人見
險似瞿塘滌瀕堆

衛恒

衛源廟

上國風帆快轉輸
石林香靄護神居
龍吟別浦泉聲細
鳥拂空潭樹影虛
蹴踘誰家春競賞
琅玕千畝翠堪書

繡衣已覺清寒甚休遣風霜到隼旗

張翔

岳陽樓

樓上元龍氣不除湖中范蠡意何如西風萬里一黃鵠
秋水半江雙白魚鼓瑟至今悲二女沈沙何處弔三閭
朗吟仙子無人識騎鶴吹簫上碧虛

巴逕特穆爾

侍分司遊金城開福寺

自慚辛苦一書生，曾聽鴻臚曉唱名。
暫領銅章來石邑，欣陪繡斧上金城。
天涵殿閣撐空濶，溪接簷牙漱淺清。
珍重坡仙留玉帶，山門千古有光榮。

閣詢

涌泉堂

何處堪澄俗慮醒，百花深處有危亭。
三春塞下煙嵐國，六曲江南水墨屏。
列岫擁迴喬木岼，寒泉飛過白雲扃。
仙壺不惜潺湲景，留與元侯緩帶聽。

呂懷遠

暮春感懷

不是今年忒負春
賞花時節走紅塵
炊梁誤作繁華夢
竊祿翻慚散誕身
寒食清明容易過
蒼顏白髮等閒新
寄聲年少諸公子
問柳尋芳莫厭頻

郭思

驪山

春風躍馬上驪山
山到平巔得景寬
地迥遠帆知渭水

天晴高塔見長安
繚垣缺處桃花開
輦路灣頭草色寒
多少繁華留恨事
不堪卮酒一悲酸

元文本

桃源採藥寓留居意

採藥桃源幾笑歌
空空懷抱養天和
南來作尉仙源好
北去懷人客夢多
愁思入詩添白髮
秋風吹棹過黃河
燒丹已有他年約
便合留家住翠蘿

宋思齊

夕陽紅

九日霜天百草休一番紅葉發詩愁
海霞不雨遷林表野火無風到樹頭
高擁殘陽蕭寺晚半隨流水楚江秋
一從題句傳情後更有何人訪御溝

劉有慶

龍虎臺卽事

都門北上路縈迴天近居庸勝境開
山舞鸞凰來大漠氣騰雲霧護高臺
九重璽殿丹青鄣十里金車錦繡堆

側耳祥風仙樂度萬年聲裏進霞杯

德濟桑雅

黃山

翠嶺名山倚碧天登臨不覺入雲煙蜀江東去練光淨
衡嶽南來黛色鮮幽澗千尋蒼柳合平田萬頃翠雲連
憑虛立久忽長嘯回望神州一慨然

完顏東臯

蘇山

圖畫天開馬嶺山仙家白鹿洞中看泠泠瑞露春生樹
冉冉香雲晝滿壇橘井有泉潮玉液桃源無路問金丹
他年擬卜煙霞計祇恐幽人笑解鞍

貢東崑

送劉有之游涇川

七里岡頭謝豹啼笳輿呶啞起朝雞玉壺駐聽青山近
綵筆行吟綠樹低茅屋斷煙迷石壁落花疎雨漲琴溪
錦袍仙子遊蹤在珍重劉通過水西

貢士達

郊行

溪樹汀花接眼明
酒逋吟債此時增
野僧煮茗收黃葉
湖客輸租到紫菱
牛背晚風三弄笛
漁梁寒照兩行罾
壯懷尚有元龍氣
高卧空山愧未能

何正

月

宴罷瑤臺出禁遲
玉輪飛上已多時
一天星斗光芒後

萬里銀河影漸移素女夜寒初倦舞嫦娥秋老正含悲
黃沙磧裏涼如水人在青樓有所思

章功懋

草堂新成

新構茅堂此日成秋霜忽向髮邊生柴桑正待歸陶令
瓜圃何妨學邵平野服便應裁綠芰晨炊更喜得黃精
無才正合藏丘壑笑向滄浪自濯纓

克嘒巴克實

贈集虛宗師

路入華陽溪水流
仙人瓊珮彩雲裘
松陰石竈丹煙煖
洞裏桃花碧樹幽
嗟我塵中迴俗駕
無人方外訪瀛洲
何當一假茅君鶴
復向三山深處遊

秦山竺

籌邊樓

危樓奇觀壯南州
公退攜琴日往遊
山勢四圍排虎距
江流一曲枕鰲頭
雲迷十里荒亭暮
風撼雙梧老樹秋

回首長安何處是蒼茫極目使人愁

唐志大

白雲嶺

羊角峰頭酒半醒探幽直欲徧巖扃千章夏木浮空翠
百丈丹梯絕杳冥仙竈暝煙凝石壁龍池飛瀑瀉雲屏
神遊欲訪盧敖去願乞凌風白鳳翎

烏裕倫屯

題三沙

鬱葱佳氣豁空濛
天馭飛霞綯海紅
萬象杳冥惟見日
九天迢遞更乘風
人騎仙鶴上瀛渚
山引蓬萊出貝宮
海外蒼生向誰理
繡衣更過九州東

黃威卿

望川亭

一到尋真眼界寬
竹緣山脚石緣灘
危峰峭拔幾千仞
險徑縈紆十二盤
空翠撲衣襟袖潤
泉聲清耳骨毛寒
黃花紅葉如相待
容我西風把酒看

刁震亨

偶題西藍

雲幢霧幄翠陰濃
靜蔭西藍百畝宮
冷透軒窗松竹影
香生池沼芰荷風
鳴禽隔葉數聲巧
流水穿莎一徑通
安得世間清淨福
拂衣來作住菴翁

喬堅

題河尾驛

池上蒼山翠作堆
池邊花竹映樓臺
夜喧燈火庖人語

地覆松花使客來戰馬不嘶闕析靜哀猿無語瘴雲開
征衣盡拂紅塵去且向郵亭進酒杯

蒼峰千丈玉槎牙錦樹模糊噪晚鴉濁水難將明月污
好山多被亂雲遮江村日落人爭渡旅店年豐酒易賒
可是炎方風景別玄冬開遍野桃花

雷櫟

玉溪山房

玉尺當年息洛流山房新築見貽謀閒敲璞石橫欹枕

笑拂珊瑚直下鉤山色半簾人似玉水光一檻世如漚
冷風悟入農軒境月滿乾坤太素秋

李伯強

九日登大理玉局山

海風吹曉上層臺玉局仙人安在哉一帶河山無限好
百年懷抱此時開菊從雨後都開徧雁到秋深不肯來
一曲浩歌歸去晚夕陽人影共徘徊

卜友曾

興聖殿進史

瑤篇初進侍清光日麗龍池晝刻長堤柳染成春水色
宮花併入御爐香金壺灑露層堦滑玉椀分冰廣殿涼
矇眊似知天意喜鳳笙新奏五雲章

和林一原題西乾廟韻

美人西扣古王宮推枕山窗曙色溶嵐氣秋來深似海
嶺雲日暮碧於松苔生堦面侵銅鼓水落波心起石龍
一路西風吹落帽黃花滿地似春濃

郭彥達都事悠然亭

悠然亭上翠浮空，林壑歸來一笑同。
稚子春遊修竹裏，詩人夜醉白雲中。
瀾山連屋書千卷，潁水當軒菊萬叢。
招隱欲題應有待，漁竿閒颺落花風。

寄建安經歷沙子中同年

離亭旌旆思紛紛，江上西風落木聞。
客棹相逢前日雨，漁罾猶挂隔溪雲。
小樓吹笛青山老，返照移尊碧草曛。
萬里霞洲望不極，祇將秋水贈夫君。

懷友

憶得城東賣酒旗，維舟立馬意誰知。
江流衮衮相思後，帆影悠悠獨去時。
巫峽秋雲連泰華，金陵春草接黃陂。
紅塵孤負滄浪釣，猶擬梅邊寄一詩。

郭君彥

入京

鳳凰城闕壓金湯，龍虎旌旗護未央。
萬國衣冠朝玉座，百蠻歌舞進瑤觴。
花迎宮扇紅雲曉，日照天袍翠霧光。

江海小臣無以報空將詩句美成康

野寺晚景

寺對清溪水繞闕冷然鐘鼓翠微間樓臺無影日沈海
松檜有聲風滿山猿嘯石亭遊客散龍歸雲洞老僧閒
詩成一笑歸來晚獨棹扁舟泛月還

王鈞

題趙榮祿水村圖

寒煙漠漠鎖荒村日暮帆歸浦
淑昏颼颼秋風鳴老樹

娟娟流水繞柴門
平沙雁起聲如寂
斷岬曾懸影若翻
要問先生得真趣
玩圖默坐復何言

潘耒

題鄱陽廬日章青山晚對樓

村北村南半掩扉
空濛疊嶂渺煙霏
束薪谷口樵人唱
採藥林中野叟歸
落木烏棲九秋老
蒼藤猿嘯片雲飛
西風簾捲憑闌坐
一笑掀髯送夕暉

張守大

日新宮訪道者不遇

九箕山下地仙家與客尋真步落霞洞裏清香燒栢子
爐中新茗煮松花古壇寂寂春常在浮世悠悠日易斜
聞說道人騎鶴去料從勾漏問丹砂

王仁輔

惠山詩

紅杜溪邊艤小舟青蓮宇內作清遊土花繡碧淡如畫
嵐翠潑雲濃欲流短李清風存古意大蘇團月洗春愁

摩挲泉石舒長嘯未羨神仙十二樓

丘元鎮

蔡涇關

客行涇口上危橋北望城闌十里遙
港汊不容三尺水舟航全藉兩番潮
蠶苗半起桑迷眼雉子深藏麥到腰
暮宿前村楊柳渡買魚沽酒慰蕭條

丁珉

題紫微宮

地隔紅塵一徑開，清虛疑是小蓬萊。
丹房有藥常留火，石徑無人半鎖苔。
樹色暫迷汀雨合，江聲如咽海潮來。
桃花滿院春風暖，題詠誰同夢得才。

王翊龍

和李治中韻

城東橋
新成

英雄老去覺顏凋，約矢無書可射聊。
春暮流光嗟逝水，山深幽夢付回潮。
翠林鳥聚雲帷合，晴沼魚吞雪絮消。
我欲雙溪釣煙雨，彩虹聞已跨飛橋。

倪應淵

西園

水映朱闌漾陸離
憶曾飛蓋得追隨
庭喧畫鼓開筵早
座擁紅裙獻曲遲
楊柳挽風掀醉帽
荷花瀉月入吟卮
轉頭樂事無尋處
藤絡頽垣草網池

許希顏

贊監郡公

金章紫綬照南州
身在陵陽最上頭
曉雨桑麻吳地暖

西風擺稜楚鄉秋朱幡到處行雙鹿綠野何人佩一牛
見說御屏題姓字崇班早晚侍前旒

朱得先

次馮介溪閒居韻

竹屋松窗杳靄間林猿沙鳥共溪山種花常占青春好
讀易堪消白晝閒隱處雲泉思共酌夢中煙樹正相關
他年容我狂吟客獨立斜陽拄杖斑

梅德明

送傅經歷

三年主畫向南陽，便覺蕭然兩鬢蒼。
審象幾時求傳說，為郎從昔老馮唐。
柳枝歌斷山杯盡，梅雨晴來江路長。
未得還家問松菊，黃金臺上看翺翔。

潘如璫

移居黃冲

西崗西畔翠藤遮，石徑斑斑帶薜花。
閒客敲門來看竹，山童掃葉為烹茶。
張琴松下風聲細，讀易梅邊月影斜。

潘岳愛山曾入畫聞孫此日又移家

題劉慶遠樵隱

門外蒼苔一徑雲柴門不入軟紅塵且從山客閒看奕
未必書生竟負薪松粉飄香輕拂面嵐光滴翠冷侵人
好留喬木為梁棟莫學焦桐爨下陳

病中懷友

煙霞門巷少人行吟對清秋鬢雪新愁裏常中酒賢聖
病來多辨藥君臣林梢斜日明紅葉池面微風弄白蘋

惟有山翁最知我無由縮地謾勞神

潘泰之

和錄事吳正傳登景德閣

上國久賢吳季子風流非復舊潘郎
君詩秋色同瀟灑我興滄洲空渺茫
宦海才名雖異調騷人胸次豈殊鄉
三生杜牧今何處眼冷禪林木葉黃

師晦文

次錢公茂見寄

短褐蕭條稱鷓冠
冥棲長欲寄林間
承家不負駒千里
學道聊窺豹一斑
歸去未成空綠髮
相看不厭祇青山
吟邊賴爾能知我
莫惜琴書半日間

何致中

送趙伯淵

送去臨岐別緒長
少留吹帽醉重陽
秦淮倚棹秋聽雨
易水驅車曉度霜
吳祐肯成青竹簡
謝玄不佩紫羅囊
熟知二父才名盛
素業承家未易量

送馬彥卿

相逢一笑即相忘
况是黉宮六月涼
解榻正依松桂影
分書共挹芰荷香
闌干鍾乳生金鼎
磊落驪珠滿錦囊
歸去重來知幾日
貂裘應拂敬亭霜

汪士深

題景德寺

寺占陵陽第一峰
寶扉珠樹碧玲瓏
鶴巢霄漢浮圖頂
僧舍煙霞丈室中
高閣鐘聲聞遠近
上方燈影徹西東

一從杜牧題詩後翰墨誰能繼古風

齋居遣興答施晉卿

百年襟抱着悲歡晚節從容任考槃
白髮已從公道得青山常似故人看
經時積雨開新霽出苑秋風耐曉寒
欲寄新詩無別恨目隨征雁楚江干

汪士明

送涇縣祝教諭歸鵞湖

小邑三年一笑歸鵞湖山下有荆扉
因思張翰蓴羹美

忘却琴高藥澤肥
久客兒應歌陟屺
到家人想下鳴機
每懷朱陸談經處
牢落空山幾夕暉

遊木瓜園

木瓜名品擅江東
三月花開煙雨中
十里明霞紅步障
數峰春色錦屏風
壓枝絳蠟融成蒂
映地珊瑚矮作叢
秋實勝如丹頰美
更期躍馬訪林翁

汪洊雷

次潘季通遷居韻

萬卉蒼蒼今已非古梅猶有歲寒枝橋分野色春還好
門對嵐光晚更宜茶竈改須黃葉煮琴牀已帶白雲移
題詩莫厭催租吏鐘鼎山林各有為

甘梅軒

遊水西同憲掾李仲

幾度匆匆過水西回巖樓閣久留題此行却伴嶺雲宿
半夜忽聞山鳥啼漁火滿灘船上下人煙隔岸樹高低
明朝莫待闌黎飯踏月披霜過賞溪

徐秋雲

西湖

涼洗冰壺壓兩峰
鏡鷺無地覓驚鴻
芙蓉池館鴛鴦雨
楊柳樓臺燕子風
玉笛度雲聽似夢
畫圖浮水望如空
斗牛已屬乘槎客
何處凌波第一宮

觀國詩

金溝晴色照燕然
紫殿紅樓玉樹煙
萬雉入雲環五衛
六龍扶日擁羣仙
教坊月夜歌如水
繡局春風錦作天

挾策遠臣身萬里祇將金鏡獻君前

漢武帝

萬戶千門禁漏遲建章花發錦成幃瑤池有信青鸞至
金屋無人白燕飛風起輪臺春寂寂露零仙掌月輝輝
樓船簫鼓繁華夢汾上年年祇雁歸

閨怨

一自鰥郎出剡溪簫聲長伴乳鴉啼魂消秋水玉蟬翼
淚濕春風金裏蹄別恨不禁楊柳外相思祇在杏花西

珠簾夜夜空明月愁殺落紅香滿泥

武林

芙蓉城闕夕陽紅歌舞三千上碧空
繡嶺看花蝴蝶夢
錦江吹酒鯉魚風當年紫簾開仙仗
今日青山是梵宮
曾向黃金臺上望九天閭闔五雲中

周永言

春日感興

春風庭院柳吹花暗度流年感物華
石斛水香魚有子

畫梁灰冷燕無家
春愁爛熳來難遣
午夢飄蕭去莫遮
欲汎曲江陪舊宴
浪船搖曳晚川斜

王汾

次戴文祥歸田韻

野徑逶迤度石橋
娟娟修竹翠旌搖
疎籬曉吠眠雲犬
高樹寒鳴泣露蜩
袖拂琴絲留客奏
香縈銅篆隔簾飄
歸來陶令多清事
更向春前種菊苗

老去幽棲還自適
詩成應遣和羊何
到家杖履登臨徧

回首江湖感慨多
草閣正紉蘭葉佩
水鄉頻聽竹枝歌
絕憐門巷塵囂隔
有客常從醉碧荷

許上之

和戴奎韻

溪上扁舟載鶴過
紅塵回首謾如何
晚年丘壑襟期好
此日江湖感慨多
狂客空遺鸚鵡賦
家人休唱戍邊歌
等閒一笑成疎放
倒着秋衣似敗荷

梅珪

用韻呈戴東野

江村十日無來客
雨後蒼苔一寸深
誰為賡歌彈匣劍
自教供具費贏金
夕陰冉冉雲歸屋
涼思紛紛月滿林
疎散更憐無別事
據牀時伴候蟲吟

翁葵

書蔣氏軒壁次韻

殊方客思轉淒然
瘦菊離披酒熟天
乾葉滾風填螳穴
敗蕉滴雨洗蝸涎
握鎌似刈雲登圃
收網疑牽月上船

秋興正濃歸興切清宵頻夢柳橋邊

李文潛

送友人之閩

閩中自古繁華地公子翩然動宦情
醉客桄榔渾勝酒喚人鸚鵡自知名
青榕雨過雲屯野丹荔風吹錦滿城
不用黃金買歡笑蠻歌女子最輕盈

周伯武溪西隱居

安陽郡人周處士疎籬矮屋住山陰
雨添江樹十分綠

水漲沙溪一尺深
花漾銀瓶春酌酒
香燒寶鴨夜彈琴
幽居料得清如許
愧我江湖萬里心

王毅

濟川橋

簾幙天香桂子秋
白沙翠竹護中洲
平分風月雙溪水
高摘星辰百尺樓
鑄劍空懷今古迹
留槎不礙去來舟
虹橋可接天河路
我欲梯雲汗漫遊

鄧賁

晚眺

晚步從容出薜蘿吟詩聊當竹枝歌
寒流漸縮溪橋少臘雪不成山霧多
官賦人歸荒嶺路野燒煙起夕陽坡
江鄉盡處閩鄉近老盡塘蒲無雁過

蔡九思

訪太元天師

飛車擁蓋下三神曠視齊州九點塵
黃石穀城千載意翠壺蓬島四時春
嵩高海濶丹青遠地闢天開紫氣新

見說桃花紅萬樹扁舟來問武陵津

施性初

雨中同從弟宿田舍

鵲鵲相逐暮天陰破帽長江覓短吟
十頃水田春布穀一天風雨夜同衾
草腥宿雁投湖水煙暝歸牛入柏林
明日東鄰赴雞黍還不飲我孤斟

王東

同鎮陽李先輩登臨川擬峴臺

楚塞蕭條客復來已無秋渚藕花開西風曠野孤城出
落日空江白浪迴山似襄陽非故國地連吳會有高臺
南遊萬里頻回首潦倒徒傷賈傅才

明月樓次王碧虛韻

王子吹笙醉未休絕憐夜半思真遊河流橫絕三千里
月色斜分十二樓湘浦春回修竹暗平山夢斷曉雲稠
嬋娟不似當年貌門掩西風紫桂秋

羅觀

五華樓

世祖平南九十春
蒼山花木幾枯榮
曉寒海氣連雲濕
夜坐鐘聲帶月明
滿目黿頭疎雨寺
幾家籬落夕陽城
不堪樓上懷今古
斷雁西風兩袖輕

潘音

真覺寺訪蔡上人

為尋支遁叩禪關
趺坐觀空出宇寰
淨土無塵勞白拂
天花如雨落青山
龍皈寶座香雲滿
鵠繞經臺佛日閒

誰謂陶潛偏嗜酒從今蓮社未應還

蘇天爵

送同知任君玉西歸

薇花曾見照青春今日都門又送君
入蜀使迎新太守
渡瀘人識舊將軍
琴聲彈落巴山月
馬首披開劒閣雲
見說西州民事簡
客來多誦長卿文

御選元詩卷五十

謹案第六頁前七行瀛島蟠龍涎吐玉按謝宗可
咏物詩作玉吐涎與此异

第十八頁前二行籀龍引水循除下刊本除訛徐
據別本元詩改





總校官庶吉士臣侍朝
校對官檢討臣蕭九成
騰錄監生臣朱文佐

欽定四庫全書薈要

集部

御選元詩卷五十一



詳校官原任主事_臣李斯咏

欽定四庫全書薈要卷一萬八千四百六十三

集部

御選元詩卷五十一

七言律詩十

呂思誠

桂林八景

錄二首

堯山冬雪

堯山絕秀嶺南天
雪壓林巒飄素煙
高倚暮雲屏掩翠
半消晴日玉開田
驛梅逢臘巖前發
羽檄衝寒徼外傳

何日樓頭閒拄笏兩堦舞罷對瓊筵

西峰晚照

西風吹向桂林西數點晴雲落照低絕嶽倚空排寶戟
斜暉轉樹繞雌霓錦紋零亂霞前映翠羽參差兩後迷
還似峴山詩酒客醉來聽唱白銅鞮

于文傳

至順四年四月九日同王叔能柳道傳錢翼之

胡古愚遊天平山次古愚韻

蒼壁屯雲戟衛森
白雲入戶袞衣臨
千章喬木還如舊
一尺流泉不在深
賸有桑麻居杜曲
豈無觴詠集山陰
登高却省曾遊處
短髮搔餘不耐簪

韓鏞

送李彥芳

奎壁文章入九重
遙瞻使節向閩中
分襟客路柳初綠
艤棹春江花正紅
部檄百城沾化雨
海天千里肅清風
懷賢戀德情無限
夢逐旌麾過甬東

宇文公諒

送復見心住定水

定水招提鳴鶴東
鑑湖歸去泛孤篷
鉢衣不濕荷花露
玉麈遙生桂子風
山靜祇看雲自動
江澄莫訝水如空
沃洲有約尋支遁
還許清談共野翁

張翥

無題

見時略略望遙遙
有月闌干待袖招
得巧蜘蛛絲縷細

傳聲鸚鵡舌關嬌仙家絃管寧無譜天上星河亦有橋
雲雨或時消息斷不如朝暮石城潮

聞笛

何人吹笛傍江干木落淮南夜色寒三弄水邊人艤棹
一聲雲杪客憑闌梅花簌簌吹應落楊柳依依折欲殘
惆悵綠珠何處在綺窗深鎖月漫漫

中秋廣陵對月

散盡浮雲月在東白蕉衫冷小庭空星河夜影尊壘裏

城郭秋聲鼓吹中落葉有光時墜露鳴蛩無響不含風
此生五十三回見祇遣嫦娥笑禿翁

丁亥元日

梅花院落雨聲中窗外春寒淅淅風臘酒潑醅浮玉螳
夜燈挑燼落金蟲星環甲紀驚身老雪解寅朝驗歲豐
還喜驛書催上路寸心常在日華東

喜雨

久旱
苦蝗

日氣如焚土氣腥黑雲當午忽冥冥雨工分下旗千隊

神姥攜來酒一瓶牛馬長河迷渚渼龍蛇平陸起雷霆
快看一洗飛蝗盡猶及秋田晚稼青

春日偕監中士友遊南城

樓閣參差紫翠間微風不動綵雲閒柳垂禁籞絲千尺
水繞宮溝玉一環春樹鳥鳴圓似筦夕陽駝影兀如山
醉鞭緩緩吟歸去燈火城東未掩關

三月二日賞杏花光岳堂分韻

柳色初青草漸茸春寒猶勒杏花風新煙院落清明候

過兩園林罨畫中洛社衣冠今日再蘭亭觴詠此情同
吾年最老身仍健更向尊前借酒紅

臘日飲趙氏亭

城上高亭一再過每看風物費吟哦近詩頗效寒山子
往事徒成春夢婆賸買十千燕市酒閒聽二八越娘歌
梅花枉報春消息祇遣今年別恨多

秋日陪吳興諸府公宴魯公池上

芙蓉池上會羣公滿意華筵笑語中虹影連蜷山外雨

荷香澹蕩晚來風
歌催銀甲筇逾急
涼入金尊露易空
我亦玉堂揮翰手
題詩合在水晶宮

中秋張外史招賞月失約賦以謝之

明月中天霧氣消
酒醒涼思正飄飄
星河不動秋空濶
鐘鼓無聲夜寂寥
露下遠山皆落木
風來滄海欲生潮
仙家玩事無由到
虛負瓊樓聽玉簫

浮山道中

處處人煙有酒旗
棟花開後絮飛時
一溪春水浮黃頰

滿樹暄風叫畫眉入境漸聞人語好看山不厭馬行遲
江蘿綠遍汀洲外擬折芳馨寄所思

聽松軒為丹丘杜高士作

長松千樹擁前榮虛籟還從樹底鳴一片海濤雲杪墮
幾番山雨月中生茶香夜煮苓泉活琴思秋翻鶴帳清
安得南華老仙伯相隨隨軒上說風聲

次韻劉伯貞與金山即休了長老唱和

老禪居處水雲重此地纖塵不可容潮色平鋪無際海

日光先上最高峰
蹋花佛馭紅牙象
獻寶神騎白耳龍
第一江山第一座
幾時來聽講時鐘

送絕宗繼講師住大雄寺

大展三衣古道場
真人高拱殿中央
曼陀雨散天花落
薰陸煙生石乳香
纚纚風雷飛講舌
耿耿龍象繞禪牀
師行不廢宗雷社
會覓籃輿到上方

壺洲為上清張道士題

錦水西頭觀闕青
仙家原不隔滄溟
鳳麟洲渚寒凝碧

雲霧衣裳夜降靈金醴浸花留客醉玉笙吹月使龍聽
看君福地容蕭爽長與曾孫宴幔亭

仙娥玩月圖為野雲陳氏題

仙娥微步下高寒獨立長松月滿山妝影透明金背鏡
佩聲飛動玉連環洗空碧海銀蟾冷舞罷瑤堦白鳳閒
不是丹青寄顏色行雲無夢到人間

霍丘孫遊武林湖山之勝貽之

千頃平湖繞郡城畫船小槩蕩春聲紅酣花港風荷密

王照梅岡雪樹明煙月長留歌舞地山川不改古今情
君行須到峰南北為覓蒼苔石上名

翰林三朝御容戊戌仲冬朔把香前宮

嘉禧殿前初日高瑞光先映赭黃袍雲間瑞露收金掌
仗外微風颺彩旄黃鶴仙人周子晉碧雞使者漢王褒
禁園尚覺餘寒在未放春紅上小桃

余伯疇歸浙東簡郡守王居敬

四明遊客住京都旅舍青燈照影孤家信十年黃耳犬

鄉心一夜白頭烏却攜長鋏辭金水直挂輕帆到鑑湖
為問蠡吾王太守別來安穩有書無

送涂茂才北游

黃河十月已流冰暫解行裝住廣陵逆旅壯懷消北斗
故山歸夢入孤燈千金燕市方求馬萬里天池欲徙鵬
曾是公卿有知己孝廉船上覓張憑

越僧無涯號棲雲乞賦

上方何處但聞鐘深護林扉翠幾重卧冷衲衣侵片石

行隨錫杖度千峰
松晴每下安巢鶴
潭暮時留聽法龍
更欲移禪沃洲去
微茫巖洞不曾封

故御史王楚鰲元戴為臨川王伯達三畫求題

雙鳳山人茅作屋
五雲閣吏繡為衣
寫將瀟灑滄洲趣
留待風流二老歸
歲月無情遺墨在
江湖多事宿心違

寒藤古木江西道
惟有當年白雁飛

右雙鳳山居圖山在臨川五里王自

奎章典籤為鷹

史故云閣吏

晝畫溪頭春水波
美人蘭棹遠來過
杯如賀老稽山酒

曲有吳兒小海歌樓館雲晴空翠濕汀洲花暗夕陽多

只今粉墨餘高致愁絕樵風冷薜蘿

右山陰春霽圖
時憲巡行越中

小史堞前煙水空淮山無數直叢叢使君援筆寫秋色
舟子唱桹乘晚風幾處漁家依落木半汀殘照下飛鴻
白雲望斷仙遊遠應在蓬萊碧海中

右萬港秋汎圖
時為淮西僉憲

春日有懷柯敬仲博士

建章鶯囀曙光初上直開門漏點疎花擁西清森仗衛
星臨東壁煥圖書漢庭長者多推轂楚國騷人久卜居

為問五雲仙閣吏綵毫春詠近何如

中秋望亭驛對月代祀北還

月色滄波共渺茫
驛亭雜坐看湖光
仙家刻玉青蟾兔
帝子吹笙白鳳凰
蘆葉好風生晚思
桂花清露濕空涼
回槎使者秋懷濶
倒瀉銀河入酒觴

正月九日夜雪甚寒

雪後西山照眼青
早寒微霰又飄零
昨非未必今皆是
衆醉何妨我獨醒
學篆每朝臨碧落
存神長夜養黃庭

若為喚得瀛臺侶相與吹簫上杳冥

雪中早朝

北風吹雪浩漫漫曉出津橋立馬看
春入上林花樹早水連平地海波乾
金城萬雉微茫濕月闕雙龍翬扇寒
今日天顏知有喜紫宸朝下散千官

寄陳敬初郊九成

憶昨閭門綰柳條遠煩相送過楓橋
夕陽陌上東西路春水江頭早晚潮
老境此心惟白社英年何處不青霄

詩成別後應俱進時遣郵筒慰寂寥

遊天竺寺

石梁濺水濕蒼苔陰洞旁穿澗底回殿閣金銀從地湧
山林圖畫自天開龍隨僧到分雲住猿聽人呼下樹來
游興未闌斜日盡馬頭呼酒尚徘徊

題張外史馬塍新居

窈窕丹房古澗阿長松修竹繞層坡桃源隱者時相遇
茆洞仙人夜或過沆瀣杯寒供曉食青冥笙響答空歌

白雲浮出池痕滿知是龍泓宿雨多

登金山吞海亭了公請賦

危亭突兀戴鰲頭俯視滄溟一勺浮龍伯衣冠藏下府
梵王臺殿起中流扶桑夜色三山日灩澦江聲萬里秋
老我惜無吞海句但磨崖石記曾遊

賦中書左曹小瀛洲

東曹地迴集名郎宛是仙家紫翠房閭闔上通天咫尺
蓬萊移出海中央金波日暖浮鳩鵲玉樹春濃下鳳凰

幾度夢回清夜直此身如在五雲鄉

三月望日望虎丘寺題小吳軒

海湧峰前雲樹盤佛宮飛閣出巔巘虎來古塚金精白
龍卧秋池劍影寒禪老說空留壞石鬼仙題句下虛壇
憑高不盡登臨興更借西山晚翠看

東西馬塍春行簡平湜伯容

清明時節每多陰楊柳人家花滿林侵曉乍收連日雨
賞春長負百年心鳧翁一一蒲塘暖雉子斑斑麥隴深

為報能詩平處士剝攜芳酒共幽尋

鐵笛為孟天睇賦

愛此輕圓鐵鑄成何須楚竹選孤生年多化作青蛇色
夜靜吹如彩鳳聲繡出碧花凝錯落冷涵金氣發鏗清
最宜攜向君山去一聽仙翁奏月明

寄見心上人次韻

自入赤墀青瑣間舊遊禪侶亦闌珊青山只憶招提境
白首初辭供奉班馬為空羣猶矯矯鳥能求友自闕闕

終期一舸相尋去知在姚溪第幾灣

題唐子華畫王師魯尚書石田山房

秋水橋邊紅葉林數家茆屋傍青岑岡頭種玉朝煙暖
壠上鋤雲宿雨深摩詰輞川宜入畫少陵常曲自成吟
東新歲晚來同煮應許山中道士尋

寄題杜原父懷友軒

尺五城南近世紛移家來並武夷君他年功業誰青史
此客山林自白雲石氣曉侵書幌濕溪聲時雜櫂歌聞

故人已
有同棲約杖策行穿虎豹羣

瓜州與成居竹王克純登江風山月亭

風起西津斷客艘
熊家亭上得憑高
雲移鳥影沈江渚
雨帶龍腥出海濤
開闢自天留壯觀
登臨如我老英豪
放舟擬就金山宿
一夜清寒襲錦袍

冰蟾為金齊賢賦

老蟾素魄稟金精
千歲玻璃幻結成
明水夜零陰燧凍
丹書秋滿肉芝生
腹凝寒露藏虛白
影入銀河浴太清

擬問嫦娥乞靈藥與君騎向廣寒行

壬申元日大雪二日立春晴景豁然春讌有作
白雪晴天映日紅樓臺高下玉山中盤蔬曉送冰絲脆
釵杏春生蠟蒂融北斗龍杓迴後夜東皇鸞輅駕靈風
何如得接雲霄上一看煙花繞禁宮

成廷珪

八月十六日送張仲舉至秦郵驛是夕邵文卿
置酒雲峰臺望月

雲峰臺上今宵月奇絕平生此一行天水光搖秋萬頃
星河涼轉夜三更謫仙被酒騎鯨去遊女吹簫學鳳鳴
明發星查上河漢定傳詩話到蓬瀛

虎溪三笑圖

三老風流笑口開山中猿鶴亦驚猜攢眉入社謾多事
送客過溪能幾回僧影欲隨秋水去虎聲偏傍石橋來
東林絕響今千載撫卷題詩愧乏材

寄張仲舉助教

三寄新詩竹下來多君高興憶東淮塵埃沒馬昏歸舍
風雨聽雞曉入齋此日陽城須諫議當時方朔謾詼諧
瓊瑤花底相思夜酒滿春城月滿街

寄巴克實尚書

憶陪冠蓋集通津下士無由拜後塵曾和淮南招隱曲
得從天上謫仙人鵷鷺在列誰堪並鴻鵠高飛不可馴
遙想退朝香滿袖題詩還記竹軒春

寄烏爾古孫幹卿參議

紫宸奏對出班行畫省論詩畫漏長三月不知燒筍味
一春還憶煮茶香幾人白髮黃花酒何處青山綠野堂
扶植皇綱在今日中原草木仰輝光

上清盧道士所藏雙龍圖

仙潭煙霧曉冥冥彷彿飛空劒氣腥巖穴幾年當蛻骨
畫圖今日露真形天瓢水淺陰猶伏寶藏雲深夜不扃
好就盧敖聽驅使八方行雨鼓雷霆

同諸公遊西城木蘭院

三月西城風日好短筇隨意踏晴沙王孫不識薜蘿草
童子來尋枸杞芽白髮有人中卯酒清泉無火煮春茶
山扉寂寂僧歸晚落盡辛夷一樹花

送陳子山狀元赴太廟署令

天上詞臣錦作裳喜趨清廟奉烝嘗寶刀刻頌登彝鼎
金硯揮毫撰樂章太液秋風黃鵠下齋壇明月紫芝香
禮成月薦應分胙綵服承恩列北堂

廣陵岳宮醮夜觀王澹淵高士歲事自登瀛橋

迎師入黃籙壇

濛濛雲氣濕霓旌小隊紅綃鳳蠟明
鸞鶴舞隨行道影
魚龍出聽步虛聲淮南高士青毛節
句曲仙人碧玉笙
一路天風吹不斷此身今夕在蓬瀛

嶽宮登瀛橋

疊石為橋跨兩涯祇如平地入煙霞
銀河夜擲仙人杖
碧海秋橫奉使槎
浴水先迎三島日
隔闌遙見十洲花
月中時有簫聲過多是山頭聖母家

題山居圖

石子坡頭松兩株
水光嵐氣護幽居
山翁被酒愛騎馬
溪友放船來捕魚
秋色自隨黃葉老
野懷常共白雲舒
何時卜築如圖畫
竹下開軒更讀書

瑞雪為劉芝田賦

風捲寒溪漾碧沙
曉林驚見玉橫斜
人間風日不到處
天上神仙解種花
九地暖回龍有穴
三山雲靜鶴無家
泛舟來覓芝田叟
留作山陰勝事誇

送余廷心翰林應奉

楓葉蕭蕭江已秋
吳船三日住揚州
靛花深染青綾被
雲葉新裁紫綺裘
征驛馬嘶風滿樹
別筵人散月當樓
明年春雁將書去
人在蓬瀛第幾洲

畫魚

生平蹤迹侶魚鰕
浦月山風滿客槎
曾向春盤登北鮓
更從丙穴薦南嘉
賞花釣得留詩友
折柳穿來覓酒家
萬里江湖春夢遠
於今空對畫中誇

寄謝察院高德進憲使寄來楊友直書居竹軒

三大字

三字封來墨未乾
堂軒舒展對琅玕
高人不待籠鵲換
好客多從載酒看
月夜有懷通白下
秋潮無信寄長干
清臺翠柏應千丈
靜想風霜卷地寒

夜泊青蒲村

黃葉飄飄秋滿天
數家茅屋更翛然
村中老人不識字
溪上小兒能駕船
薺菜登盤甘似蜜
蘆花紉被暖如棉

此中長得無宵警
春雨扶犁學種田

懷方壺高士

塵湖山下足煙霞
羨爾方壺道士家
雨後放龍耕綠野
日中呼犬試丹砂
瓊林一路芝如草
碧澗千年竹有花
正欲相陪此深隱
半盃分我飯胡麻

韓致用夢鶴

疇昔相過赤壁磯
神交遺思尚依依
應從五色雲中過
還繞三珠樹上飛
月色滿庭空夜帳
露花如雨濕秋衣

蓬萊山下花無數
遲子吹簫作伴歸

送智惠隱住水月禪院

放船直到棲禪處
萬頃湖心一徑開
綠樹鳥驚風落果
碧潭龍去水生苔
西巖尊宿傳燈在
東海高僧杖錫來
今夜月明清似水
太空無地著纖埃

寧境寺涵碧軒

老衲築軒湖上頭
半間曾借數宵留
窗迎紫翠千峰月
簾卷玻璃萬頃秋
別浦暝時迷遠樹
滄洲明處見飛鷗

定回坐待波瀾靜一點珠光夜不收

送陳性之崑山從事

祇將從事寫前銜省檄封來自拆緘六案更湏勞彩筆
一官猶未換青衫風生海市朝持酒日落江城暮却驂
我未識君空悵望恍如煙水隔仙凡

題王維賢所藏盛子昭畫雙松繫舟圖

雲門寺前風物幽布韞青鞋吾昔游葫蘆盛酒待明月
舴艋載琴當上流長松並立幾千尺狂客一別三十秋

何當挂席過湖去東望草堂姑少留

宿鶴沙張氏草堂

草堂借我作行窩杖履頻煩太史過
滿地白雲清晝永隔溪黃鳥綠陰多
銀餅自瀉中山酒鐵笛誰翻小海歌
今日逢君湏盡醉西家亭館奈愁何

寄題松江青龍瞿睿夫通波草閣

五月通波草閣寒綠陰長日此凭闌
山如碧鳳參差出江作青龍左右蟠
攬子燒香雲母火櫻桃行酒水晶盤

老夫亦有鷺溪絹也欲相從看寫蘭

題何德深溪南小隱

宰相官之不受招碧梧林巷自逍遙溪頭二月花先發
洞裏千年雪未消朝士過門時載酒仙人飛佩夜吹簫
社圖誰寫耆英會還肯中間著老樵

寒食日松江有懷廣陵

老來也欲惜年華春正濃時不在家江上苦遭寒食雨
夢中猶見廣陵花書藏舊篋應無恙酒憶新樓不用賒

日暮荒城聞鬼泣東風吹恨滿天涯

次饒介之遊東臯作

半雨半晴春更佳也知郭外少紛華
蠻王步頭多載酒李家園中來看花
曲檻芳楹通隱見蒼松老竹相交加
安得長繩繫烏足不放西崦紅日斜

縱飲狂歌晚未歸松陰香霧轉霏微
醉中謾喜朱顏在頭上爭禁白髮稀
無數野花迎客喜一雙沙鳥傍船飛
浣花溪上真堪笑每日朝回祇典衣

同張仲舉夜宿寒橋

柔櫓聲乾破寂寥
青山磯下宿寒橋
乾坤萬事雙蓬鬢
風雨孤舟半夜潮
丹鳳不來秋又老
玉人何處水空遙
幾時重醉秦淮酒
細聽漁樵話六朝

李子英心遠亭

門外黃塵掃不開
何由吹得到靈臺
閒看倦鳥投林去
靜愛孤雲出岫來
彭澤高人多逸興
峨眉仙客有天才
祇今誰到悠然處
同采秋香共一杯

送袁季文赴帥幕

少年書劍學從軍
幕府於今氣不羣
白髮元戎多好武
青衫從事最能文
帳前草檄花如雨
江上維舟水似雲
把酒高歌成遠別
不知何處又逢君

南城暮春

南城雨盡午風和
二客相從步履過
流水陂塘春事減
落花門巷晚愁多
銀餅自瀉沙頭酒
寶瑟誰調陌上歌
莫寫江南斷腸句
賀郎憔悴髮空皤

周平叔夜宿崇明寺海雲樓偕羅成之隱君文
長老盧隱君以沙頭雙餅為韻各賦四詩次韻

卷後 錄二首

天台老衲兩眉龐自起高樓枕石缸煮茗別開留客處
論文多近坐禪窗冥鴻散去猶相逐獨鶴飛來不作雙
明發仙舟上霄漢定傳詩話滿滄江

天水空明接杳冥老禪三昧解通靈欲將東海為平地
盡卷西江入淨餅宿靄微分沙鳥白晚風猶帶毒龍腥

他時月夜來相覓笑指狼峰五朶青

丘克莊敬雲樓

君家樓外雲如海五色輪囷埽不開每就月明檐下宿
更隨秋色座中來瓊臺夜鶴迷蹤跡玉女春衣費剪裁
看汝乘將朝帝所舉頭西北是蓬萊

題玉巖上人溪山野趣圖

流水淙淙石齒齒滿庭雲氣欲模糊白鷗溪上秋多少
黃葉山中路有無十月雨深漁屋破三江風急野航孤

年來難覓幽居處空向晴窗看畫圖

題嘉興水西寺夾溪樓寄新仲銘長老

新公邀作夾溪遊為說前朝有此樓雲氣遠開天北極
風光仍在水西頭虛檐古瓦緣蒼鼠曲澗輕波漾白鷗
宸翰僅留飛白在煙塵漠漠使人愁

饒介之有詩見貽次韻奉答

一夜南風約曉晴看山如在越中行丹藏別室生虹氣
嘯入空巖作虎聲倒澗枯松留古怪懸崖飛瀑漱寒清

神仙若箇能千歲吾欲崆峒問廣成

寄周平叔先生就求蒼耳子

周侯久不通書問夜夜滄江入夢頻五月采來蒼耳子
幾時分送白頭人沙頭酒熟田毛足港口船來海錯新
南北相望千百里老來幽獨倍傷神

送羅成之移居崇明其子季通亦之本州校官
先生八月乘煙霧妻子同隨海上槎太守賓筵先肅客
廣文官舍即為家波濤浩蕩藏陰火島嶼微茫接太霞

聞說三洲多藥草可能無意到丹砂

寄靜逸處士顧仲庸

環堵蕭然一室寬祇除詩酒寄清歡
餅中有粟分寒士袖裏無書上熱官
楊子暮年空識字龐公早歲已遺安
先生獨卧風塵表吾欲相從接羽翰

和張仲舉博士見寄至日詩

衡門風雪人稀到一箇幽軒竹四圍
半子送年將舊酒諸孫晚歲索新衣
驚鴻此日猶南去老鶴何年共北飛

却憶太常張博士天香攜袖早朝歸

送盛克明辟掾浙省移家吳興

十年三送滄江別此日分攜又不同
辟掾遠趨青瑣闥移家喜近水晶宮
勿論後會知何地且念離羣獨老翁
幕府郎君因問訊為言憔悴坐詩窮

和周子通助教同張元禎倡和詩卷

嬾性何堪接貴遊長松之下每科頭
不能取友山中社更欲移家海上州
老去生涯清似水興來詩思澹於秋

玉堂傑作難為和白首狂吟祇自愁

題崔原亨竹深處余家有竹數竿人號之居竹
軒原亨城西時有竹亦數竿人號之竹深處余
與崔君通家來往所好相同故及之

居竹軒中也自寬不愁無地著琅玕文公胸次空千畝
李洞門前祇一竿天與老夫醫惡俗日憑童子報平安
崔家別墅尤高致遲子歸來守歲寒

和婁所性見寄韻

想見滄洲白鳥雙
寒潮依舊落空江
移家有日同春酒
剪燭何人共夜窗
欲寄短書心未展
每傳佳句意先降
吾家歲晚風流甚
雪後冰蘚尚滿缸

寄噩禪師四十年前在天寧方丈曾有求賦毛

女者

短杖輕包歸去來
水雲多處少塵埃
一春海鳥依檐宿
五月溪蓮繞舍開
雲外送僧歸日本
月中攜客過天台
衰翁不得瞻圓相
猶望新詩托雁回

送清淮叟上人遊五臺

雁門西畔是靈山山作青螺五髻鬟春日花開殘雪裏
僧房人在白雲間善財參問何時遍文暢嬉遊幾日還
淮海清公更瀟灑早將聞見動禪關

張仲舉博士書來言其老健能夜書小字仍飲
量不減喜而賦此

一秋兩得平安報讀罷寒暄喜不勝花底振衣清似鶴
燈前書字小如蠅蛻仙道骨無人識博士官銜自此升

江上蓴鱸好時節豈無清夢到吳興

介之懷古有詩見和復用前韻以答

江水東流去不還幾人不老似青山九州目斷蒼煙外
萬古魂消落照間石上鳥啼松樹合水邊人散柳花閒
更容野客重攜酒為報園翁莫掩關

送謝參軍朝京

萬重玉帛會蓬萊先報中吳進表來內使傳宣催引見
舍人當殿拆封開干戈載戢龍顏喜正朔重頒鳳曆回

却袖天香上歸騎定分春色到蘇臺

和李克約東臯雜興

一春開遍雨中花幾向東園管物華老去始知身是客
愁來空擬醉為家江樓簾箔霏香霧野塞旌旗綯采霞
曳杖歸來還自笑夕陽原上數殘鴉

芍藥花開江雨晴幾時重作看花行松間攜妓從教俗
竹下留賓也自清一夜春愁無處著三分月色為誰明
貧家亦有琴堪典好把平生意氣傾

送學無遇長老歸江南

新賜袈裟染茜紅拈花消息悟靈峰
大開海會容三教遠致嵩呼祝九重
貝葉有書馱白馬葛藤無語問黃龍
湖船滿載燕山月歸照招提萬樹松

送錢萬戶歸泉南

八月歸來下澤車將軍此意復何如
十年不佩封侯印萬卷惟收教子書
風月祇今尊有酒江湖何處食無魚
建溪為謝羅從事久不題詩寄竹居

再遊金山寺

放船重到金山寺，獨對滄江照鬢絲。
過客謾驚天險處，老僧曾見海枯時。
通宵月色魚龍喜，絕頂秋聲鶴鶴悲。
瓊樹花開不歸去，妙高臺上要題詩。

贈綾錦墩隱者錢慶餘

手挂烏藤五尺長，山行時著古衣裳。
缺文自補雲間志，賣藥多收海上方。
茅屋秋風催釀秫，錦墩春雨看移桑。
野人笑指長安路，馬足車塵有底忙。

李孝光

鄱江寺擁翠樓

縹緲新居一握天，好山將綠到樓前。
煙霏入閨清談麈，紫氣薰人濕坐氊。
未放白雲分榻住，愛看青雨映簾懸。
自憐華髮江南客，也為登臨憶仲宣。

送青元觀道士王泉

淮南道士傳鴻寶，眸子照人雙電光。
貫日白虹生玉氣，出山青髓射天漿。
去年蹋雪尋丹井，連日題詩滿畫廊。

長憶青元送客處
柳花無數繞衣裳

次陳輔賢遊雁山韻

竹杖梭鞋去去賒
一春紅到杜鵑花
山椒雨暗蛇如樹
石屋春深燕作家
老父行尋靈運屐
道人喚喫趙州茶
明朝塵土芙蓉路
猶憶山僧飯一麻

送人還鄱陽

東西湖水百花洲
行子歸時雪已收
明月可能隨客去
浮雲自足使人愁
重來柳樹應千尺
相見梅花隔數州

我亦高歌望吾子春風好在仲宣樓

送國侍者

離別還同箭離絃題詩修竹記他年蘆人楚語時相問
估客巴歌也自傳遙望牽鵬上南斗正逢飛雁出青天
縣縣遠道勞歸夢忽見梅花意惘然

送魯公還秦南

錦衣樹燾向秦川有客將離獨黯然日食猶分丞相餅
傳呼自愧孝廉船春風過雁青天外暮雨行人積水邊

應到清湘聞款乃楚儂此曲至今傳

送鄞縣尹

秋風吹汝髮成絲移病還家竟不疑官是伯強曾補處
身如元亮已歸時青山老去渾相識黃菊平生最受知
我亦相從上吳會夕陽騎馬看殘碑

入雁蕩山

興國年間路始開前朝碑墨半蒼苔雁橫巖月知秋到
僧蹋湫雲看瀑來一嶺未教靈運識萬松誰道了翁栽

此山曾共秋風約說與山猿不用猜

訪王君濟

好溪沙渚更停橈來訪仙人王子喬稚子候門如有喜
故人索酒不須招門舍古樹春先到簾映青山雪未消
老子紅顏如昔日祇添白髮不相饒

七月十四夜宿東縣明日登山上亭

海上歸來訪舊遊草堂開宴醉新秋金花木落魚初鱸
玉液香浮酒旋篋展席涼風依綠樹振衣斜日濯清流

五年不見孫郎面一笑相看總白頭

雨後村行

澤國秋深景物非西風獵獵又吹衣
路行落日離人去山破寒煙獨鳥飛
潮信到灘推月上鄰家停火候船歸
村醪香軟鱸魚美自笑吟邊貌不肥

苦竹村

籃輿軋軋路高低苦竹村南古峴西
草舍纍茅留客飯麥田焚棘斷人蹊
花梢春意闌禽語石磴霜痕印虎蹄

心自愛閒身尚役好山何處是真棲

十里

官河十里數家莊石埠門前繫野航
梅月逢庚江雨歇稻花迎午水風涼
橋橫自界村南北堠斷難知里短長
倦矣野塘行瘦馬雲山杳杳復蒼蒼

賦得越山越水

賀家湖上又秋風放翁宅前東復東
兩行雲樹忽遠近十里荷花能白紅
遊人濯足銀河上越女梳頭青鏡中

我欲張帆上南斗扶桑碧海與天通

梅魂

處士孤魂不可招夜深疑與雪俱消
香流東閣風吹樹夢過西湖月滿橋
隔歲冰霜哀契濶空山玉雪想孤標
蕭蕭翠袖令人瘦莫遣尊中一片飄

越鄉次舊韻

興來不買剡溪船匹馬衝寒款著鞭
遶驛水聲殘雪夜半橋山影夕陽天
雁橫雲宕猶千里春入梅花又一年

喚僕更尋前處宿有詩還和舊時篇

白沙早程

聽得鄰雞便問程前途猶有客先登
官河半落長橋月僧榻疎明昨夜燈
古渡潮生鷗浸夢野田風急浪歸滕
雁山喜入新詩眼踏破秋雲最上層

丙子泛舟登輿

雞埒豚窠半榛荆村北村南感易生
雨過雪消連日凍潮平水歇下塘聲
鴉啼古樹寒煙濕人謁荒祠小艇橫

一段鄉情渾漠漠隔江斜日暗孤城

次晚春韻

燕幕沈沈春晝永閒敲棋子小闌東拍天漲綠連朝雨
滿地殘紅昨夜風草際夢回詩有債柳邊寒薄絮無功
韶光暗換年年事莫遣閒愁著髮中

宿魏仲遠宅

每憶君家好兄弟輕舟遠出踐深期春風吹雨曹娥渡
夕照滿山虞舜祠即問寒暄如夢寐各言加飯慰相思

重來應記呼燈處
夏蓋山前月上遲

周伯琦

遊金山寺

江心一簇翠芙蓉
金碧晶熒殿閣重
隱士有緣來化鶴
梵王無語坐降龍
鐘聲兩岼占昏曉
海眼中冷湛夏冬
八十高僧供茗罷
細談蘇米舊時蹤

遊焦山寺

涉江已閱裴公洞
復訪焦先到此山
險絕遠同巴蜀峽

歸然對峙海門闔神蛟戲浪時潛躍野鳥巢林自往還

建業青山廣陵樹開軒盡在酒壺間

裴公洞即金山寺
蓋唐裴公所隱之

地石洞尚在焦山寺乃漢
隱士焦先隱居之所也

紀事

并序

至正十一年歲辛卯二月一日天下貢士及國子
生會試京師凡三百七十三人中書承詔校文取
合格者百人充廷對進士先二日鎖院凡三試每
試間一日十有二日揭榜時參政韓公伯高知貢

舉尚書趙君伯器同知貢舉予與左司李君孟幽
考試博士楊君士傑修撰張君仲舉同考試收掌
試卷則典籍毛君文在也諸公皆翰苑舊遊誠盛
會也紀事奉呈

鳳凰銜詔下亨衢多士盈廷總八區北斗光芒明策府
東風生意滿皇都墨池淨几環香鼎燭影疎簾聽漏壺
拭目慶雲華穀旦敢令滄海有遺珠

禮闈半月得從容料峭春寒似早冬警夜每聞三弄角

論文直到五更鐘
雁來遠路驚流景
草茁閒庭失舊蹤
得士共為天下賀
明朝揭榜醉黃封

答復見心長老見寄

浙水東頭佛舍連
蒲菴上士坐忘年
五雲古衲層瀾湧
百寶浮圖列宿躔
牀上貝書多譯梵
門前海舶直通燕
比丘喜得堦蘭秀
應種菩提滿法田

九載遙離得遠書
幾更歲厯斗旋樞
華星秋月超元白
峻嶺重江限越吳
柏子樹陰浮碧砌
蓮花漏水響銅壺

老夫素有林泉癖一曲何當乞鑑湖

曾堅

次韻答朝友曹子貞

柳簇金溝蘸碧波雲深貝闕瞰重坡
鳳凰曲奏鈞天樂
烏鵲橋通織女河
萬井間閭春浩蕩
六街車馬曉經過
山人素有林泉興
奈此承明侍從何

支渭興

至正二十六年重午梁王宮門外觀射柳隨侍

文武賜宴渭興賦詩

地平如席草如茵
年少將軍酒半醺
朱鬣馬穿人影過
綠楊枝逐箭鋒分
旌旗色映宮牆柳
鼓角聲飄海外雲
何日鯨鯢俱息影
普天偃武共修文

貢師泰

和石田馬學士殿試後韻

并序

丁卯歲學士與先君同為讀卷官在院倡和甚多
此則放榜後所作韻也

春風馳道入宮牆青瑣深沈引夕郎草染綠波生太液
花扶紅日上披香聲名已重千金璧恩寵方隆七寶牀
治世斯文今極盛九天星斗自成章

崇真宮醮罷敕畫吳宗師像

海日曛曛照九衢霓旌霞旆擁高居尚方敕畫仙官像
中使傳宣學士書劒氣朝寒垂白練丹光夜暖出紅蕖
石壇醮罷清如水猶聽松陰起步虛

送黎兵胡萬戶南遊

將軍仗策去安邊
詔下東南萬里天
雲海旌麾趨玉帳
春江鼓角載樓船
黎人滿溜檳榔水
蜺戶齊分牡蠣田
遙想軍中無一事
坐驅千騎獵平川

送陶翁歸豫章

秋雨初晴擺棹香
蟹紅魚白憶江鄉
十年客枕雞聲月
千里歸帆雁背霜
入室親朋羅酒饌
上堂兒女挽衣裳
逢人莫說金華事
漢署今無白髮郎

送壽弘毅應奉赴興國路經歷

院門深鎖落松花東接蓬萊小海斜絳蠟夜深催視草
紫泥春早聽宣麻鳳凰池上人辭直鴻雁江南客過家
幕府秋來清似水吟詩應對白鷗沙

贈仙居散人

青山四面玉嵯峨中有山人隱薜蘿細雨閒門芳草滿
微風深澗落花多童窺丹竈時驚鶴客寫黃庭欲換鵝
我亦平生愛疎散春來應許謝朝珂

廣微天師祈雪有應詩以美之

九枝燈照碧壇空
龍虎旗高滿殿風
綠簡夜深朝玉陛
素幢春淺拂珠宮
一天凍色星河合
萬里冰華陸海同
明日內家應錫宴
綵符爭取綴釵蟲

送連子奇歸隱贛州

薊門風冷白鷺來
萬里孤舟一日開
去路定過彭澤縣
到家重上鬱孤臺
煮茶林下收黃葉
理釣磯邊掃綠苔
太史明朝占處士
少微依舊傍三台

上都詐馬大燕

紫雲扶日上璇題萬騎來朝隊伍齊
織翠轡長攢孔雀
鏤金鞍重嵌文犀
行迎御輦爭先避
立近天墀不敢嘶
十二街頭人聚看
傳言丞相過沙堤

梭欄別殿擁仙曹
寶蓋沈沈御座高
丹鳳銜珠裝騶裊
玉龍蟠甕注葡萄
百年典禮威儀盛
一代衣冠意氣豪
中使傳宣捲珠箔
日華偏照鬱金袍

卿雲弄采日重暉
一色金沙接翠微
野韭露肥黃鼠出
地椒風軟白翎飛
水精殿上開珠扇
雲母屏中見袞衣

走馬何人偏醉甚錦鞬賜得海青歸

簫韶九奏南風起沙燕高低撲繡簾醺醺酒多杯迭進
鷓鴣香少火重添舊分宮錦緣衣襖新賜奩珠簇帽簷
日午天官供異味金盤更換水晶鹽

寄王魯川推官

公庭草綠訟聲稀時見雙雙蛺蝶飛曹史盡隨衙鼓散
理官獨抱獄書歸曾同太守行紅旆更與高僧別翠微
近報南臺多辟薦殿前早晚賜朝衣

送宋仁甫赴池州陰陽教授

北風吹雪路漫漫萬里荆門客正寒
自愛青衫同博士也勝白髮老長安
城南款段此時別江上芙蓉到日看
我亦春來買舟去九華絕頂望揚瀾

新蝶

杏樹生香蠹化成向人飛下不勝情
寒辭薄翅猶粘粉暖溢柔鬚始弄晴
燕舞盤中嫌露重鶯歌扇底避風輕
春閨未解南華夢乞與滕王為寫生

送明原道南豐判官

日華西轉萬年枝
記得甘泉奏賦歸
佩馬新迎州倅節
緋魚舊賜從臣衣
詩成江驛梅花瘦
酒醒山城蕨菜肥
為謝南豐舊詩友
白鷗春夢繞苔磯

送江西傅與礪赴廣州教授

買得吳船便欲東
更騎羸馬別諸公
文章久許江西盛
詩律應歸海外工
人羨義陽封介子
客從秦時薦揚雄
五羊城下南風起
茉莉花香荔子紅

冠州

萬里關山鬢易華
冠州橋下御河斜
千門煙冷分榆火
三月春寒見杏花
新水聚船人超市
順風吹旆客還家
莫憐書劔頻漂泊
擬學東陵老種瓜

朱仲文編修還江西諸公分題賦詩為餞余適
同載南歸約至揚子橋分別因為賦此

瓜州渡口山如浪
揚子橋頭水似雲
夾岸芙蓉紅旆旒
滿汀楊柳綠紛紜
一杯酒向今朝別
萬里船從此處分

他日重來須艤櫂莫教驚散白鷗羣

揚州別韓克莊僉憲

紅日東生綠霧收海風吹客到揚州
露分仙掌金盤冷香動瓊花玉樹秋
使者乘驄開大府仙人騎鶴醉高樓
朝來別我垂楊畔珂佩如雲簇水頭

題丁元善鍊師陽明樓

賀老家西百尺樓好山多處稱仙遊
丹光散作霞千縷劍氣吹成月一鉤
窗外鶴歸遼海暮袖中龍起鑑湖秋

道人久直黃金殿可使歸來雪滿頭

贈天台李鍊師

翠蛟青鳳下晴空家住天台第幾重
歲久松肪成琥珀夜深丹氣出芙蓉
仙童奏簡騎文虎太乙懸旗起絳龍
昨夜從師到天上故山還著白雲封

吳景文居庭牡丹盛開飲後有感

韶光天遣屬君家猶是東京第一花
金鼎夜寒團絳雪錦機春暖簇紅霞
倚風忽作纏頭舞避日還將便面遮

薄暮闌干同醉倚却憐孤客髮先華

送有亨姪還錢塘

嗣宗諸姪仲容賢客路飄零雪滿顛曾為頌椒留子美
却思戲蠟愛僧虔十年江海三杯酒百里溪山一釣船
何日兵戈得休息敬亭春雨共歸田

次韻李清叔元夕

絳燭燒煙散滿城九衢車馬似潮聲山河影轉琉璃薄
陸海光浮菡萏平蜨睡誤翻歌扇暖鵲驚疑報畫簷晴

夜闌人靜天如水依舊殘星數點明

題子固所藏鮮于墨蹟

一自昭陵藏墨本書名誰復更超羣忽傳河朔專行草
不讓吳興變隸分黃鵠夜深隨落月白鷺秋冷化孤雲
風流賴有張公子雪繭封題比右軍

遊元沙馬上偶成

十里青山馬上看東風拂面尚微寒偶隨芳草來僧寺
却笑飛花點客鞍東野先生方載酒西都博士亦彈冠

莫憐白髮江湖遠且為諸公一盡歡

泉州道中

千山落日丹霞北萬里孤城白水南
玉枕霜寒凝紫蔗金丸露暖熟黃柑
海商到岼纔封舶蕃國朝天亦賜驂
滿市珠璣醉歌舞幾人為爾竟沈酣

題仲穆山水

翡翠為岨金作坡白雲重疊護層阿
背琴童子松間坐束帶仙人馬上過
高閣半天開寶月飛流千尺瀉銀河

王孫已老丹青在轉覺風流意氣多

送顧仲莊之海北

釣龍臺下與君別萬里東南何日還
星斗動搖天在水
海門空濶浪如山
珊瑚寶樹來三島
鸚鵡金籠出八蠻
簫鼓船回應北上
鳳池春早珮珊珊

送洪元成赴靜江治中

海上東風吹鬢毛
杏花開處雨蕭騷
薦書舊最司征考
官錦新裁別駕袍
落日山城旌旆遠
拍天春水舵樓高

莫憐投老多辛苦
萬里行囊有豹韜

題李則平憲副所藏息齋竹

滿川風雨長簷管
吹作參差三鳳凰
籜粉已翻鱗甲紫
墨花還染羽毛蒼
春寒弱幹當軒潤
日暮清陰入酒涼
便欲截筒鳴嶰谷
却愁彈瑟望瀟湘


謾興

客懷寥落鬢鬢髩
對鏡空慙雪一簪
蒲葉野塘方綠漲
杏花春雨正紅酣
心隨斗柄常瞻北
身逐飈車復指南

夢覺午窗人寂寂一雙巢燕自呢喃

御選元詩卷五十一

謹案卷五十一第十四頁前四行巴克實舊作拔
實今改 前八行烏爾古舊作烏古今改




謹案第五頁後二行江離綠遍汀洲外刊本離訛
離據蛻菴集改

第九頁後七行憶昨閭門綰柳條刊本綰作挽據
蛻庵集改

第三十一頁後七行興來不買剡溪船刊本剡訛
郊據五峰集改

第四十頁前四行莫憐書劍頻漂泊刊本頻訛煩
據玩齋集改





總校官庶吉士臣侍朝
校對官檢討臣蕭九成
謄錄監生臣朱文佐